



Otfrids Evangeliënbuch.

1.

DE FUGA JOSEPH CUM MATRE IN AEGYPTUM.

Jóseph io thes sinthes er húatta thes kindes;
was thionostman gúater, bisuórgeta ouh thia múater.
Ther engil spráh imo zúa: 'thu scalt thih héffen filu frúa;
fliuh in ánteraz lánt, bimid ouh thesan fiant!
In Aegýpto wis thu sár, unz ih thir zéigo avur thár,
wanne thu biginnes thes thines héiminges.
Ni laz iz ny úntarmuari, thia muater thára fuari;
thaz kind ouh iogilicho bisuorge hérliche.
Ther kúning wilit slúmo inan suachen ingriuno
mit bizenten suérton, nálas mit then wórton. 10
Húgi filu háрто thero minero wórto;
in hérzen giwaro wártes, thaz thu úns thia frúma haltes!
Er fuar sar théra ferti náhtes mit giwúrti,
thaz iz ni wurti mári joh baz firhólan wari;
Er ouh baz ingíangi, síu wáfan ni bifiangi,
bi thiú was er so éracar joh háрто filu wáchar.
Siu fúart er, noh ni duálta, in lánt, thaz ih nu zálta;
thar was ther sún guato, unz starb ther góteuwóto.
Thó ward thar irfúllit, thaz fórasago singit
fon gote séltsanaz joh wúntar filu wáraz: 20
Er quád, er wolti hérasun sinan éinigan sún
ladon thánana ir lánthe, er sinan liut halte.
In búachon duat man mári, er fiar jar thár wari;
súme quédent ouh in wár, tház es warin zuéi jar.